

Pelaksanaan Cukai Minimum Global

Mulai tahun 2025, Cukai Minimum Global (Global Minimum Tax, GMT) akan mula dikuatkuasakan. GMT merupakan satu daripada langkah reformasi cukai yang dilaksanakan oleh kerajaan sebagai usaha meningkatkan keadilan dan ketelusan amalan percukaian antarabangsa. Menjadi kelaziman bagi syarikat multinasional (MNE) untuk mengalihkan keuntungan mereka ke negara yang menawarkan kadar cukai lebih rendah berbanding dengan negara asal mereka. Fenomena ini bukan sahaja menghakis asas percukaian sesebuah negara tetapi juga memberikan kesan langsung terhadap kestabilan ekonomi negara tersebut.

Malaysia telah mengumumkan penyertaan rasmi dalam pelaksanaan GMT menerusi Belanjawan 2024 yang dibentangkan selari dengan inisiatif Hakisan Asas dan Peralihan Keuntungan (BEPS) OECD. Belanjawan MADANI yang dibentangkan oleh Perdana Menteri, YAB Dato' Seri Anwar Ibrahim pada 18 Oktober 2024 turut menegaskan kesediaan kerajaan untuk melaksanakan inisiatif ini bagi memastikan sistem percukaian negara lebih adil dan mampan.

Konsep GMT ini telah diperkenalkan oleh Pertubuhan Kerjasama dan Pembangunan Ekonomi (OECD) di bawah rangka kerja Model Peraturan Anti-Hakisan Asas Global [Global Anti-Base Erosion (GloBE) Model Rules (GMR)] sebagai langkah strategik untuk mengekang pengelakan cukai antarabangsa. Malaysia telah memberikan komitmen dalam pelaksanaan inisiatif ini dengan memperkenalkan perundangan GMT melalui pengenalan bahagian baharu (Part XI) Akta Cukai Pendapatan 1967. Perundangan GMT ini berkuat kuasa atas sesebuah MNE berdasarkan tahun kewangan yang bermula pada atau selepas 1 Januari 2025.

Pengenaaan GMT adalah terpakai kepada MNE di Malaysia yang memenuhi kriteria seperti yang berikut:

1 Beroperasi sekurang-kurangnya dalam dua buah wilayah bidang kuasa (*jurisdiction*) yang berlainan.

2 Mempunyai pendapatan tahunan terkumpul minimum €750 juta dalam dua daripada empat tahun kewangan terdahulu.

Secara ringkasnya, mana-mana kumpulan syarikat MNE Malaysia yang mempunyai operasi atau anak syarikat di luar negara dan mempunyai pendapatan tahunan terkumpul seperti yang telah ditetapkan di atas adalah tertakluk kepada perundangan GMT di Malaysia.

Selain itu, anak syarikat kumpulan MNE negara asing yang beroperasi di Malaysia juga adalah tertakluk kepada perundangan GMT sekiranya pendapatan tahunan terkumpul kumpulan MNE tersebut mencapai nilai ambang €750 juta.

Menerusi pelaksanaan GMT, MNE yang tertakluk boleh dikenakan kadar cukai tokokan sehingga 15 peratus tanpa mengira lokasi ibu pejabat atau tempat operasi mereka. Langkah ini bertujuan mengurangkan pemindahan keuntungan ke negara yang menawarkan kadar cukai lebih rendah, sekali gus memperkukuh ketelusan sistem percukaian global.

Pelaksanaan inisiatif ini dijangka bakal membawa perubahan ketara dalam aspek kawal selia, pematuhan dan percukaian syarikat, khususnya bagi MNE yang beroperasi di Malaysia. Syarikat yang mempunyai pendapatan tahunan melebihi €750 juta tidak hanya tertakluk kepada kadar cukai tokokan 15 peratus



Garis masa pelaksanaan GMT di Malaysia

LEMBAGA HASIL DALAM NEGERI MALAYSIA

seperti yang ditetapkan dalam Peraturan GloBE OECD, malah mereka juga perlu menyesuaikan struktur percukaian, strategi perancangan cukai dan pematuhan terhadap keperluan pelaporan cukai baharu.

Walaupun GMT dijangka dapat meningkatkan kutipan hasil cukai, kerajaan juga telah mengambil langkah proaktif untuk mengimbangi kesannya terhadap pelaburan. Kerajaan telah memberikan komitmen untuk mengkaji struktur insentif sedia ada supaya insentif yang ditawarkan di Malaysia adalah selari dengan pelaksanaan GMT selain memastikan daya saing ekonomi negara terus terpelihara.

Pelaksanaan GMT di Malaysia merupakan satu langkah reformasi yang bakal merubah landscape percukaian negara agar sejajar dengan piawaian antarabangsa. Inisiatif ini bukan sahaja memastikan MNE menyumbang secara lebih adil kepada sistem percukaian negara tetapi juga dijangka mengukuhkan asas hasil kerajaan serta mempercepatkan pertumbuhan ekonomi yang lebih lestari. Melalui pelaksanaan GMT, Malaysia turut membuktikan komitmen terhadap tadbir urus ekonomi global yang adil sekali gus membantu memperbaiki reputasi Malaysia sebagai destinasi pelaburan stabil dan berintegriti tinggi.

